

30. oktober 2018

UKA2018/106

Angajoqqaat sulingiffeqartarnerat pillugu malittarisassani atuuttut allanngortinnissaannut siunnersuusioqqullugit Naalakkersuisut peqquneqarnissaanik Inatsisartut aalajangiiffigisas-saattut siunnersuut, taamaasilluni sulingiffeqartarnek sapaatip akunnerinik sisamanik sivitsorneqartussanngorlugu. Allannguut atuutilissaaq ulloq 1. juuli 2019 aallarnerfigalugu. (Inatsisartunut ilaasortaq Randi Vestergaard Evaldsen, Demokraatit)

Inatsisartunut ilaasortap Eandi Vestergaard Evaldsen Demokraatit aalajangiiffigisassatut siunnersuutaanut imaattumik oqaaseqassuugut.

Siunnersuuteqartup siunnersuutaa tunngaviatigut Siumumiik tapersersoratsigu oqaatigerusupparput. Aamma Politikkikkut meeqqanut tunngatillugu eqqartuisarnitsinni partiit akimorlugit pingaartitsi-lluinnarluta atortitaasunut pitsanngorsaajuaannissaq ataatsimoorfigisaripput nalunngilarput.

Siunnersuuteqartup nammineq oqaatigisaatuut ukioq kingulleq upernaakkut massakkut siunnersuutigisani aamma siunnersuutigisimanerarpaa, kisiannili qinersisoqarnera pissutaanerulluni suliaq tunngavimmigut taperserpeqaraluarluni ingerlaqqinngittoortoq. Taamanilu Naalakkersuisut akissuteqaataanni takusinnaavarput angajoqqaat meeqqallu pitsaasumik toqqissisimanartumillu atungaqarlutik aallartittarnissaannik siunertalimmik aaqqissuuseqqinnissamik siunertaqarlutik arlalinnik ingerlataqalereersimasut.

Massakkullu akissuteqaat takugaanni takuneqarsinnaavoq Naalakkersuisut aningaasaateqarfimmik pilersitsinissaq pillugu inatsisissatut missigiummik suliaqalereersimasut.

Ullumikkut erninersiuteqartarnek erninersiuteqartitsisarnerlu assigiinngittorujussuummat oqaatigisariaqarpoq. Qaammammusiaqarlutik sulisut erninermi qaammammusiatic pigiinnartarpaat soorunami suliffeqarfisamat qanoq isumaqatigiissuteqarsimaneq aamma aallaaviusarluni. Ullunut 14-nut aningaasarsiaqartunut aamma aningaasat tunniunneqartartut allaanerupput. Suliffissarsior-tuusimagunillu "taamaallaat" ikiorsiissutitut tunniunneqartarlutik.

Siunnersuuteqartup siunnersuutaa tassaavoq erninermi sulingiffeqartarnerup sapaatip akunnerinik sisamanik sivittornissaa, Siumumiik tamanna akerlerinnginnatsigu oqaatigissuarput, aammalu maluginiarparput erninersiutaasartut atuutsinneqarnerini aallaaviusartut assigiinngisitaartuusut. Taamaammat Siumumiit isumaqarpugut paaseqqissagassanik qulaajagassaartoq, inatsisitigut allaannguinissaq ajunnginnerpaamik kinguneqartinneqassapat.

Naalakkersuisullu aningaasaateqarfimmik pilersitsinissamik siunertaqarlutik suliaqalereersima-nerannut ilaliutugaluta kaammattuutigissuarput erninersiutaasartut assigiinngissutaat ilanngullugit nalilersussagaat. Tamattami kissaatingaarput pingaartillugulu angajoqqaat toqqissisimallutik meerartaanngamik inuunerannik aallartitsinissaat.

Taamannak oqaaseqarluta siunnersuutip aappassaaneeraneqannginnermi ataatsimiititaliami susassaartumi sukumiisumik nalilersorneqarnissaa kaammattuutigaarput.

Jess Svane
Siumut